

ԱՎԱՐՏՎԱԾՈՒԹՅԱՆ ԵՎ ԱՆԱՎԱՐՏՎԱԾՈՒԹՅԱՆ ՀԱՉԵՐԱՆԳԸ
ԺԱՄԱՆԱԿԱԿԻՑ ՀԱՅԵՐԵՆՈՒՄ

ԱՄԱՂՅԱ ԽԱՉԱՏՐՅԱՆ, ԼԱՐԻՍԱ ՓԱՆՅԱՆ

Լեզվի հնչյունային արտահայտությունը մի բարդ միասնություն է, որի մասերի փոխներգործությունը իրականացվում է մակարդակային կազմակերպվածության սկզբունքով: Տարբեր մակարդակների միավորների հնչյունային ոահմանների որոշումը հնչյունաբանական կարևոր հարցերից է և մեծ նշանակություն ունի կիրառական խնդիրների լուծման համար, մասնավորապես խոսքի հատուկավորման օբյեկտիվ և ավելի ճշգրիտ հնչյունային չափանիշներ մշակելու հարցում, մի խնդիր, որը չափազանց կարևոր է խոսքի ավտոմատ ընկալման համար:

Խնշն է ընդունվում որպես խոսքի հատուկավորման միավոր: Տարբեր հնչյունակներ ընդունում են տարբեր միավորներ՝ շարույթ, իմաստային խումբ, տոնային խումբ, շնչառական խումբ, ռիթմական խումբ և այլն: Հնչերանգի ուսումնասիրության նվազագույն միավոր ընդունում ենք շարույթը՝ որպես հնչերանգավորման տոնային միասնություն, որն առաջանում է խոսքի պրոցեսում: Եթե նախադասության հնչերանգը որոշվում է հաղորդակցական ուղղվածությամբ, ընդ որում յուրաքանչյուր հաղորդակցային տիպ բնորոշվում է իրեն հատուկ հնչերանգով, ապա շարույթի հնչերանգը՝ քանի որ այն չունի ինքնուրույն հաղորդակցական նշանակություն, պայմանավորված է նրա անկախության աստիճանով, նրա ավարտվածությամբ կամ անավարտվածությամբ: Բազմաշարույթային նախադասություններում տարբերում են ավարտուն և անավարտ շարույթներ: Ընդ որում, նախադասության հաղորդակցային տիպը բնորոշվում է հիմնականում վերջին շարույթի տոնային ավարտվածությամբ, մինչդեռ անավարտ շարույթի տոնը պայմանավորված է հաջորդ շարույթով և հաղորդում է ոճական տարբեր երանգներ:

Իսկ ո՞րն է տոնային ավարտվածությունը և ինչպիսի դեր ունի այն շարույթի ձևավորման գործում: Հայտնի է, որ հնչերանգը լեզվաբանական բարդ և դժուար վերջնականապես չլուծված հասկացություն է: Նրա բաղադրիչների թվին են դասվում մեղեդին կամ հիմնական տոնի շարժումը, դադարը, շեշտը, տեմպը և տեմբրը: Հնչերանգի այս բաղադրիչները իրականում գոյություն ունեն միասնության մեջ, թեև գիտական նպատակներով դրանք կարող են քննվել և առանձին:

Հնչերանգը ունի օբյեկտիվ բնույթ ու որոշակի լեզվաբանական նշանակություն և պայմանավորված է տվյալ լեզվական կոնկրետի սովորույթներով: Միևնույն նախադասությունը կարող է ընթերցվել ամենատարբեր երանգներով, սակայն խոսողներից ամեն մեկը օգտագործում է միայն այն միջոցները, որոնք գոյություն ունեն տվյալ լեզվում:

Մեր ուսումնասիրության նպատակն է որոշել հայերենում ավարտուն և անավարտ շարույթների տոնային առանձնահատկություններն ու սահմանադատիչ միջոցները: Նման աշխատանքն ունի նաև գործնական նշանակություն, քանի որ այն կարող է նպաստել հայկական միջավայրում օտար լեզվի դասավանդման դժվարությունները հաղթահարելուն: Ուսումնասիրությունը կատարվել է ՀՍՍՀ ԳԱ լեզվի ինստիտուտի կիրառական լեզվաբանության բաժնի լաբորատորիայում՝ Վ. Բրյուսովի անվան մանկավարժական ինստիտուտի դասախոսների մասնակցությամբ: Կատարվել է տեքստի ինչպես գործիքային,

այնպես էլ լսողական վերլուծություն, որին մասնակցել են մոտ 10 ունկնդիրներ և հաղորդավարներ: Փորձարկման նյութը ընտրվել է Վ. Պետրոսյանի «Վերջին ուսուցիչը» և «Մենավոր ընկուզենին» ստեղծագործություններից. այն ձայնագրվել է և ենթարկվել նախ՝ լսողական վերլուծության, այնուհետև՝ օսցիոլոգրաֆիկ ուսումնասիրության: Ունկնդիրների առջև դրվել են հետևյալ խնդիրները. լսել տեքստը, բաժանել շարույթների և որոշել յուրաքանչյուր շարույթի տոնային ձևավորման եղանակը: Հետագայում այդ նույն հատվածները գրանցվել են ինտոնոգրաֆի վրա և մշակվել: Ուսումնասիրված նյութը պարունակում է մոտ 70 ավարտուն և անավարտ շարույթ:

Լսողական վերլուծությունը մեկ անգամ ևս հավաստեց, որ խոսքի շարույթային անդամահատումը ոչ բոլոր դեպքերում են նույնական և, ամենայն հավանականությամբ, պայմանավորված է ինչպես հաղորդավարների, այնպես էլ ունկնդիրների կողմից տեքստի ընկալման անհատական առանձնահատկություններով: «Վերջին ուսուցիչը» պատմվածքից վերցրած հատվածից շարույթային անդամահատումը, ըստ հաղորդավարների այսպիսին է. 1-ին հաղորդավարը առանձնացրել է 34 շարույթ, 2-րդ հաղորդավարը՝ 32, 3-րդը՝ 27, իսկ «Մենավոր ընկուզենուց» ընտրված հատվածում՝ 1-ին հաղորդավարը՝ 43, 2-րդը՝ 40, 3-րդը՝ 37: Քննենք հետևյալ օրինակը. «Այս ամենն իհարկե փոխաբերական առումով: Իրականում դպրոցական օրն էլ սկսվեց սովորականի պես»: Նախադասության «Իրականում դպրոցական օրն էլ սկսվեց սովորականի պես» հատվածը երրորդ հաղորդավարը դիտել է որպես մի շարույթ, մինչդեռ 1-ին և 2-րդ հաղորդավարների մոտ այն բաժանվել է երեք շարույթների, որոնք առանձնացվում են ինչպես տոնով, այնպես էլ դադարով. «Իրականում /դպրոցական օրն էլ/ սկսվեց սովորականի պես»: Կարելի է ենթադրել, որ 1-ին և 2-րդ հաղորդավարների՝ այդ հատվածի ընկալումը ավելի արտահայտիչ է:

Հայտնի է, որ դադարները, ինչպես միջանկյալ, այնպես էլ վերջավոր, անդամահատման հիմնական միջոցներից են, որոնք զուգակցվում են հնչյունադի հետ՝ լրացնելով և ուժեղացնելով նրա արտահայտչականությունը: Այն բոլոր դեպքերում, երբ իմաստով սերտ կապված անավարտ շարույթները արտասանվում են առանց միջանկյալ դադարի, շարույթների բաժանումը իրականացվում է տոնային ավարտի միջոցներով: Օրինակ, «Բայց երկնքի այն փոքրիկ հատվածում... Ահա այդ հատվածում նույն առավոտյան մուգ թանաքագույն ամպեր կուտակվեցին»: Նախադասության հետևյալ մասը՝ «Ահա այդ հատվածում նույն առավոտյան», հաղորդավարներից մեկը ընթերցել է առանց դադարի: Սակայն շարույթային սահմանի առանձնացումը պայմանավորված է հատվածում և նույն բառերի միջև նկատվող տոնային փոխհարաբերությամբ՝ 2 կիսատոն բարձրացումով:

Խոսքային շղթայի շարույթային անդամահատման հետաքրքիր դեպքեր են միջանկյալ բառերով նախադասությունները, որոնք մտնում են կամ նախորդ կամ հաջորդ իմաստային խմբերի մեջ, երբեմն հանդես գալով որպես առանձին, ինքնուրույն, լիովին պատճառաբանված շարույթներ: Այսպես. «Վարորդը հայհուդում էր ճանապարհը, լեյտենանտ Անտոնյանին, սերժանտ Ամատունուն և, մանավանդ ուսուցիչ Սահակ Կամսարյանին»: Ինտոնոգրամային վերլուծությունը ցույց է տալիս, որ այս նախադասության «մանավանդ» բառը ունի դրսևորման երեք տարբեր եղանակ: 1-ին հաղորդավարի մոտ այն սերտորեն կապված է հաջորդ շարույթի հետ և հնչում է առանց դադարի (մանավանդ, ուսուցիչ Սահակ Կամսարյանին) և միայն տոնի փոփոխությունը՝ 5 կիսատոն տարբերությամբ, մատնանշում է, որ «մանավանդ» բառը առանձին շարույթ է: 2-րդ հաղորդավարի մոտ «մանավանդ»-ը մտնում է նախորդ շարույթի կազմի մեջ: Իսկ 3-րդ հաղորդավարի մոտ այդ միջանկյալ բառը առանձին շարույթ է և առանձնանում է թե՛ դադարով և թե՛ տոնով:

Պետք է նշել նաև այն դեպքը, երբ և շաղկապը հանդես է գալիս որպես առանձին շարույթ իր ինքնուրույն հնչյունադաշտի ձևավորմամբ: Օրինակ՝ «Անդգույշ մի շարժում, ուղադրության թեկուզ մի կաթիլի կորուստ, և... կգահավիժեն ներքև, կիսատ թողնելով այսօրվա գործն էլ, կյանքն էլ, հայհույանքն էլ»:

Այս նախադասության արտահայտման հիմնական իմաստային կենտրոնը «և» շաղկապն է, որը զգալի հուզական բեռնվածություն ունի: «եվ»-ի առանձնացումը սրող դեպքերում բնութագրվում է երկարատև դադարով (250—400 միլիվայրկյան) և տոնի կտրուկ բարձրացմամբ: Երբեմն այն հասնում է (ինչպես 2-րդ հաղորդավարի մոտ) 5 կիսատոնի:

Այսպիսով, վերը բերված օրինակներից կարելի է եզրակացնել, որ ոչ միայն լիարժեք բառերն են հանդես գալիս որպես առանձին շարույթներ, այլև սուպասարկու բառերը, որոնք շնորհիվ իմաստի, տոնի և դադարի փոփոխության, կարող են կադմել առանձին իմաստային հնչերանգային միավորներ: Հայտնի է, որ հիմնական տոնի հաճախականությունը հնչերանգի առաջնային բաղադրիչն է և այն սահմանադատիչ հատկանիշը, որով շարույթները անջատվում են մեկը մյուսից:

Մեր փորձառական ուսումնասիրության ընթացքում ավարտուն և անավարտ շարույթների հնչյունական առանձնահատկությունները բացահայտելու ժամանակ ուղադրության կենտրոնում է եղել հենց տոնային բաղադրիչը: Ինստոնգրաֆիական տվյալները ցույց տվեցին, որ ի տարբերություն ավարտուն շարույթի, անավարտ շարույթի տոնը զգալի բազմազանություն ունի: Մեր կողմից ընտրված հատվածները պատմողական նախադասություններ են, որոնց բոլոր ավարտուն շարույթները բնորոշվում են ձայնի աստիճանական իջեցումով և անկումով. օրինակ՝ «Գարնանային սովորական առավոտ էր: Ճանապարհը դառնվեց էր ու քարքարոտ»:

Իսկ ինչով է բնութագրվում անավարտ շարույթի տոնը: Որո՞նք են անավարտ շարույթներում օգտագործվող տոները: Հաշվումները ցույց տվեցին, որ 52 անավարտ շարույթներում տոնը ավելի հաճախ բարձրացող է և փորձարկվող ահքստերում այն կազմում է 55%, իսկ իջնող տոնը՝ 35%: մնացած դեպքերում գործածվում է հավասար տոն: Քննենք հետևյալ օրինակները. «Բայց երկնքի այն փոքրիկ հատվածում, երևի մի երեք-չորս հարյուր քառակուսի մետր, որի տակ Մովսես խորհնացու անվան դպրոցն էր, ահա այդ հատվածում նույն առավոտյան մուգ թանաքագույն ամպեր կուտակվեցին»: Այս նախադասությունը բաժանվել է շարույթների. 6 շարույթ առանձնացրել են առաջին և երկրորդ հաղորդավարները, իսկ 4 շարույթ՝ երրորդը: Երեք հաղորդավարների օգտագործած տոներն էլ չեն համապատասխանում միմյանց, սակայն այս հատվածի ընթերցումը մեկ անգամ ևս ցույց տվեց, որ անավարտ շարույթներում առավել հաճախականը բարձրացող տոնն է: Հավասար տոն միայն մեկ դեպքում է օգտագործվել:

Փորձենք պատճառաբանել հաղորդավարներից մեկի օգտագործած տոնային դրսևորումները: Առաջին անավարտ շարույթը («Բայց երկնքի այն փոքրիկ հատվածում») բնորոշվում է հավասար տոնով: Մի կողմ թողնենք միջանկյալ մասը («Երևի մի երեք-չորս հարյուր քառակուսի մետր, որի տակ Մովսես խորհնացու անվան դպրոցն էր») և քննենք «ահա այդ հատվածում նույն առավոտյան» կից շարույթները: «Հատվածում» բառի վերջին վանկում նկատվում է 4 կիսատոն բարձրացում: «Նույն առավոտյան» շարույթի վերջին վանկերում զրանցվում է 2 կիսատոն բարձրացում: Վերջին վանկի տոնը պայմանավորված է նախադասության հաջորդ հատվածի բովանդակությամբ: Բարձրացող տոնը ունկնդրին կողմնորոշում է, որ հաղորդումը չի ավարտված: Առաջին դեպքում «Բայց երկնքի այն փոքրիկ հատվածում» անավարտ շարույթի հաջորդ միջանկյալ նախադասությունը կարծես մխրճվում է ամբողջ նախադասության ընդհանուր բովանդակության մեջ, դրանով իսկ առաջին անավարտ շարույթին հաղորդելով հարաբերական ինքնուրույնություն: Այնուհետև նկատվում է լարվածություն աստիճանական աճ՝ կապված բովանդակության հետ. սպասվում է, թե ինչ է պատահել՝ «ահա այդ հատվածում» և հետո՝ «նույն առավոտյան մուգ թանաքագույն ամպեր կուտակվեցին»: Սա այն ինֆորմացիան է, որի համար արվել էր տվյալ հաղորդումը (նախադասության սկիզբը):

Այսպիսով, կարելի է եզրակացնել, որ իջնող տոներն օգտագործումը տրվյալ դեպքում պատճառաբանված է և լիովին արդարացվում է ամբողջ հնչա-

դասության իմաստով: Բարձրացող տոնը այստեղ հավանորեն օգտագործվում է լսողին հետաքրքրելու համար:

Անավարտ շարույթի բարձրացող տոնը սովորաբար օգտագործվում է բարդ ստորադասական կառուցվածքներում, թվարկման, երկրնորակյան և որոշ կարգի հարցական նախադասություններում: Թվարկման հնչերանգով անավարտ շարույթների ձևավորման մեր դիտարկումները հավաստում են այն փաստը, որ սրանք ևս արտասանվում են հիմնականում բարձրացող հնչերանգով: Օրինակ. «Այդ բանահյուսության ժանրերից են՝ երգը, սրամտությունը, անեկզոտը և իհարկե առասպելը»: Թվարկման բոլոր տարրերը՝ երգը, սրամտությունը, անեկզոտը, արտասանվում են տոնի շեշտակի բարձրացմամբ (6-ից 8 կիսատոնով): Նկատվել են դեպքեր, երբ թվարկման տարրերը արտասանվել են իջնող տոնով. մի դեպքում այն հաղորդավարի անհատական մոտեցման արդյունք է, մի այլ դեպքում պայմանավորված է ամբողջ կոնտեքստով: Օրինակ. «Վարորդը հայհոյում էր ճանապարհը, լիտենանտ Անտոնյանին, սերժանտ Ամատունուն և, մանավանդ, ուսուցիչ Սահակ Կամսարյանին»: Առաջին շարույթը՝ «Վարորդը հայհոյում էր ճանապարհը», բոլոր հաղորդավարները արտասանել են իջնող տոնով, թվարկման մյուս տարրերը արտասանվել են բարձրացող հնչերանգով: Առաջին շարույթի տոնի իջեցումը, մեր կարծիքով, կարելի է բացատրել այդ շարույթի համեմատաբար հաղորդակցական ինքնուրույնությամբ:

Փորձառական նյութի քննության ժամանակ հատուկ ուշադրություն է դարձվել ավարտուն և անավարտ շարույթների տոնի փոփոխման ձայնածավալի վրա: Նկատվել է, որ անավարտ շարույթի տոնի իջեցումը չի հասնում դիապազոնի ստորին մակարդակին, այսինքն՝ դա ոչ լիակատար իջեցում է, որը սովորաբար գրանցվում է միայն ավարտուն շարույթի վերջում: Սակայն եղել են դեպքեր, երբ անավարտ շարույթի տոնի իջեցումը տվել է ավարտուն շարույթի տոնի իջեցման համանման պատկեր: Այս երևույթը նկատելի է այն դեպքում, երբ անավարտ շարույթները աչքի են ընկնում որոշակի ինքնուրույնությամբ և կարող էին դիտվել որպես առանձին նախադասություններ: Օրինակ. «Սայլի ճանապարհ էր, ձիավորի, ավտոմեքենայի չէր»: Այստեղ բոլոր շարույթները արտասանվել են իջնող տոնով, որը սակայն չի հասնում դիապազոնի ստորին մակարդակին: Այսպիսով կարելի է անել հետևյալ եզրակացությունները.

1. Տեքստի հնչյունական նկարագրությունը ենթադրում է նրա հատույթավորումը հնչյունապես ձևավորված որոշակի իմաստային միավորների, որոնք անմիջականորեն պայմանավորված չեն նախադասության շարահյուսական կառուցվածքով: Այսպիսի միավոր է շարույթը, որի սահմանում նկատվում է տոնային փոփոխություն՝ կապված ինչպես տեքստի բովանդակության, այնպես էլ դրա անհատական ընկալման հետ: Այդ առումով շարույթ տերմինի գործածությունը ավելի նպատակահարմար է, քան շնչառական խումբ, դիֆմական խումբ կամ տոնային խումբ անվանումները, որոնք ընդգծում են ու հիմնված են խոսքի ֆիզիոլոգիական գործոնների վրա և նկատի չեն առնում իմաստային կողմը:

2. Շարույթի առավել մանրատված առանձնացումը կապվում է խոսքի, խոսողի հուզական վիճակի, նրա արտասանության ընդհանուր տեմպի, ինչպես նաև առանձին շարույթներին նրա կողմից տրվող կարևորության հետ:

3. Բազմաշարույթ նախադասության կազմում տարբերակվում են ավարտուն և անավարտ շարույթներ: Ավարտուն շարույթի վերջավոր տոնով բնորոշվում է նախադասության հաղորդակցական տիպը, որը պատմողական նախադասությունների դեպքում արտահայտվում է ձայնի աստիճանական անկումով: Անավարտ շարույթները բնութագրվում են բարձրացող, իջնող և հավասար տոներով՝ պայմանավորված մյուս շարույթների հետ ունեցած իմաստային կապակցության աստիճանից, ընդ որում այս դեպքում դրանք կարող են արտահայտել ոճական տարբեր երանգներ:

ИНТОНАЦИЯ ЗАВЕРШЕННОСТИ И НЕЗАВЕРШЕННОСТИ В СОВРЕМЕННОМ АРМЯНСКОМ ЯЗЫКЕ

АМАЛИЯ ХАЧАТРЯН, ЛАРИСА ПАНЯН

Резюме

Среди различных единиц, выделяемых для описания интонации (ритмогруппа, томогруппа, дыхательная группа и др.), нами выбрана синтагма, характеризующаяся определенной смысловой и интонационной самостоятельностью. Аудиторский и интонографический анализ текстов произведений В. Петросяна «Последний учитель» и «Одинокая орешина» показал, что синтагмы выделяются на основе как смысла высказывания, так и эмоционального состояния говорящего. Интонация конечных синтагм определяется коммуникативным типом высказывания, а неконечных—степенью их зависимости от последующих синтагм. Наиболее самостоятельные характеризуются понижением тона, а наименее самостоятельные повышением тона или реже—ровным тоном.